

大方廣佛華嚴經疏卷第三十八 精八

唐清涼山大華嚴寺沙門澄觀撰

大文第四彼果分中即攝無盡行離障成德  
窮盡生界爲利樂故果有二種一離障果從  
護煩惱生二成德果從護小乘生前中又二

精八

一煩惱染生遠離果此離惑障二業染生遠  
離果此離業障皆言生者煩惱染等猶如生  
食今是寄位出世之首能離彼生今初離惑  
先舉所離後於如是下結成能離就所離中  
所起孰著出沒是此總相餘皆是別總中孰

著是前地中解法慢也論云我知大知者我  
知謂孰我能知大知謂孰所知大法出沒者  
是前地中正受慢也出者三昧起義故謂修  
起彼定沒者三昧滅義故謂定所除今計我  
能修此定此定即我所修故論云我修我所  
修已釋總句別有五種一本二起三行四護  
五過本即所有身見至蘊界處於中身見爲  
總我等爲別別中我人等四爲人我慢蘊界  
處三法我慢而云本者有二義故一以此  
我爲解法正受二慢之本二者身見復爲二

我及六十二見之本有此差別此中身見若約實位準唯識論此地斷第六識中俱生身見及所起過由得出世道品治故以分別起者初地斷故是以瑜伽名爲微細薩迦耶見若約寄位準仁王經四地名須陀洹位以寄出世之首故則亦得斷分別身見二思惟者明起謂不正思惟而起慢故三觀察者明行謂心行緣中多觀所得若法若定求覓勝相今他知故四治故下三句明護治者數數觀察修治所見我所者起於我想取彼勝相屬

我已故財物者如畜財者受用護持故以上三事防護自己所得五著處者明過謂心堅安處法定二事故五中前三起慢方便後二隨助慢心上總及顯相正是所起後結離中由得道品正助方便無不離也第二此菩薩下明離業染上修道品正離煩惱煩惱既去業亦隨亡亡不善業而修善業文中先亡惡後進善惡有二義故不應作一佛所不譖者尊教緣故不爲二煩惱染者畏惡名故不作惡名則違利生道故進善有二義反此可知

文不作煩惱所染異凡夫業作順菩薩道業則異二乘第二成德果中有四一於勝功德生增上心欲果二彼說法尊中起報恩心果三彼方便行中發勤精進果四彼增上欲本心界滿足果此之四果前三從前生後一復從此三果生前中初二護小心果後一護小行果前中初果者由本欲上求下救今更爲物轉轉上求故云增上文中二初牒前修因後如是而得下顯所得果今初即牒前護小乘中總句也隨所起方便慧者牒前不捨一

切衆生故不捨衆生而修道品是有方便則道品慧解修習於道及助道者即前修習如是功德也道即四地證智助道即菩提分法二顯所得果有十句初總餘別總云潤澤者深欲愛敬故謂由修二道自有所潤深欲敬上由爲物修潤及含生深欲愛下別中九句釋彼潤澤有三種勝一柔軟心者明樂行勝謂證法適神故二調順者調和善順緣中無礙是三昧自在勝上二是行體三利益下七句明離過對治勝此是行用於中初句總利

他無過故利益自利無過故安樂下六句隨過別顯若不寄對難顯性淨之德六句即離六過經中皆是能治一無雜染心治爲利於食過及爲名如心過二治少欲功德過三治不求勝智過上三皆自利四治懈怠不攝衆生過上四皆離於行生過後二離於教生過謂五治自見取不遵勝教過六治捨爲首不隨說行過如說修行於聞思中最爲其首今捨彼首所以爲過又上救生即前悲果求殊勝智即上求果第二此菩薩下說法尊中起

報恩心果謂前地中從佛聞法是說法尊今起傳法修行之心則爲以報諸佛恩也上希求種智由知佛有恩故今思報亦上求果文中先別明後總結今初十句初總餘別總云知恩者謂若隨順師教行報恩行方是知恩故別中彼行有九種類攝爲七一知報恩者依尊起報恩心尊即是佛此爲恩主故偏名報恩二有二句依同法起報恩心此明順同行善友意三質直柔軟二句依法起行謂隨順受教不違師命故云質直發修行事逢苦

能忍故云柔軟四無稠林行者依受用衣食  
於施主所自過不覆故五雖實有德而不高  
慢六善受教誨得師言詮七於教不倒得師  
意旨上七品中初二依人次三依行後二依  
教所依雖異皆同報恩二此菩薩如是下總

精入

四

結謂十句不出此三忍即心極和善同住安  
樂調柔即質直柔軟寂滅即通結餘句第三  
如是忍調柔下發勤精進累謂行二利行勤  
無怠故於前不捨衆生護小行中修勤故名  
方便行中正是無盡行相文中二先牒其得

時後得不休下正顯於中十句初總餘別別  
有九種不休息義一不雜染者彼精進行平  
等流注故雜染者共懈怠共染故染則著而  
太過懈則墮而不及若琴絃之急緩若不進  
不怠為平等流二不退自乘上二自利三起  
廣念利他之心四為無邊衆生作利益願起  
攝取行上二利他上皆自分下四勝進謂五  
熾然者常忘順行猶如熾火上進叵滅論經  
名光明兼照他地六修習過餘七魔惑莫壞  
上三自利八攝取衆生即是利他上八皆行

後一是解謂九自斷疑惑決是非故能伏他言如無畏故若能具此爲正修習第四是菩薩下彼增上欲本心界滿足果菩提分心是本心界正念真如修上道品故云滿足由精進故瑜伽四十八躡前精進後即云由此精入

五

因緣所有意樂增上意樂勝解界性皆得圓

滿故知此果從前二果生謂意樂即第一果增上意樂即第二果勝解界性即此心界謂由第三精進令前二果增長故云滿足文中一句初總餘別別有九種一深心不失者彼

道品心修行增益故此一分下皆勝進二於五地已上勝上證中明鑒決斷故三即彼上證因謂對治善根治行過前故云增長四除滅所治煩惱障垢五斷除此地中祕密疑事即是智障微細法慢爲祕密疑事由無攝受則能除之上二除內障六觸境明斷七依勝樂行三昧適神八上依佛力化衆生故九論云依現無量三昧心智障清淨故此除定中智障若直就經文總顯本願皆得成就第二位果中亦三初調柔中四一調柔行二如

摩尼下明教智淨三此菩薩下別地行相四  
佛子下總結地相初中三一練行緣二皆恭  
敬下明能練行三又更下明所練淨二中一  
供佛福行二以此下迴向大行三於彼下聽  
法慧行於中先在家後復於下出家然登地  
已上具十法界身若出若在何啻不可然隨  
義隱顯有無前却以前三地寄同世間還依  
世法初二人王故有三地天王故無四地已  
上寄出世之首故重明有表心出家故於調  
采行中明之欲順天無出家不於攝報中辯

六地已上表證法平等無出無在故皆無出  
家三所練淨中有法喻合金莊嚴具者以三  
地阿含金現作此四地證智嚴具故餘所有  
金者即未作嚴具之金二教智淨者以此地  
成就證淨從體起用故偏有此文前以教成  
證故喻金爲嚴具今從證起教故喻摩尼放  
光摩尼寶珠即證智體無垢名淨寂照名光  
圓滿名輪具上三義故稱證智言能放光明  
者即放阿含光也謂以此證智證入無量教  
法門義故故能照光明即是證智所照教法

以爲智處證能普照示現於教得教

六三引依

證起焰故地名燄慧非餘寶下對前顯勝風等不壞對他彰堅餘並如前第三重頌有十七頌分三初十二頌頌位行次四頌位果後一顯名結說前中四初一頌增長因分次二

頌清淨分三有四頌頌修行增長分於中初二頌護煩惱後二頌護小乘四有五頌頌修行增長累餘並可知第五難勝地所以來者略有四義一約寄位四五六地寄出世間前寄初果此寄羅漢義次第故雖有四果舉於

始終以攝中間此依本論約所觀行相以後六地既觀緣起寄同緣覺故但二地寄於聲聞仁王下卷瓔珞上卷約入配位以七地未離分段故四五六七寄同聲聞二前明覺分相應慧今辨諸諦相應慧故三前得出世未

精大

七

能順世今能五明攝化故次明之四前得三十七菩提分今辨方便所攝菩提故此後三意出於瑜伽言難勝者解深密云即由於彼菩提分法方便修習最極艱難名極難勝此從初說故初分經云善修菩提分法故等攝

大乘云由真諦智與世間智更互相違合此  
難合令相應故唯識同此世親釋云由此地  
中知真諦智是無分別知世間工巧等智是  
有分別此二相違應修令合能合難合令相  
應故名極難勝此通初中後瑜伽云今此地  
中顯示菩薩於諸聖諦決定妙智極難可勝

極難成不住流轉寂靜聖道名極難勝此大  
同本分上諸經論多舉難勝之法未知何等  
無能勝耶十住論云功德力成一切諸魔不  
能壞故此對人顯勝亦兼於惑煩惱魔故然  
諸經論言異意同皆辨真俗無礙若據實位  
約仁王經初地菩薩四天王即雙照二諦平  
等道今約寄位前寄出世此方却入故云無  
礙故此地中斷於下乘般涅槃障者即前四  
地出世眾生死苦樂趣涅槃此障五地今入  
真俗無差別道便能斷之此斷欣厭即是二

愚由此證得類無差別真如亦約生死涅槃皆平等故其所成行亦成二種謂諸諦增上慧行五明處教化行此二無礙故得無差別法身之果皆義旨相順次正釋文文亦三分初讚請分中九頌半分二初八頌半供讚後一頌請說前中三初一菩薩供讚次一天王衆餘皆天女於中三初一偈標次四偈半讚道次即正住地解脫道後即地滿勝進道初言勝慢者慢有二種一他地慢謂四地中得出世智取其勝相名爲勝慢今以十種淨心爲治二自地慢謂於此十心希求勝相從以爲慢以隨順如道爲泊此二通名勝慢故此偈半讚具德初偈具智斷次半具恩後一具

精入此三德是故應供三一偈結讚及請並可知第二正說分中先明位行後辨位果前中論分爲三初勝慢對治二佛子菩薩摩訶薩如實知下不住道行勝三佛子菩薩摩訶薩住此下明彼果勝初即加行道及初住地無間道次即正住地解脫道後即地滿勝進道初言勝慢者慢有二種一他地慢謂四地中得出世智取其勝相名爲勝慢今以十種淨心爲治二自地慢謂於此十心希求勝相從以爲慢以隨順如道爲泊此二通名勝慢故此

一分有其二道論云勝慢對治者謂十平等  
深淨心者前段能治也又云同念不退轉心  
者後段能治也言同念者即後總句順如與  
如同一念故不退轉者即後段末句略舉初  
後以該中間前地治解法慢此治身淨分別  
九  
慢所治有殊不濫前地言身淨者得出世智  
不染身故文中二先治他地慢後佛子菩薩  
摩訶薩住此下治自地慢前中三初結前舉  
後二微起正顯三結能入地今初平等有二  
義一是如理二是因果淨法千聖同規名深

淨心是此地觀解故論云於平等中心得清  
淨故此復何異後地觀察十平等法此有三  
異一此地治前於淨起慢故偏明淨法平等  
後地對此依真入俗通觀染淨諸法皆悉平  
等此約舉等理以顯心淨後地舉觀察以  
入等理三此通理事二等後地一向約理融  
二諦故此皆地地背相捨後漸勝故二正顯  
中十心分二初三明諸佛法論云謂三世力  
等者即果位十力等也後七明隨順諸佛法  
二利因行順成果故於中前六自利後一利

他前中合爲三學初戒次定餘四慧故離爲  
七淨一戒淨二定淨三見淨四度疑淨見疑  
相顯經合一句爲成十故五道非道淨此前  
五淨大小名同小乘六名行淨七行斷淨以  
彼宗中趣盡滅故今大乘六名行斷經云修  
行知見略無斷字七名思量菩提分法上上  
淨以依行斷起勝求故若約位者初二在見  
道前以創背凡過宜以戒防欲生真慧理須  
習定然未合理判屬世間次三在見道以見  
道中斷身見故斷疑故斷戒取故戒取是非

道知無漏慧是正道入見道時十使俱斷偏  
言三者涅槃經說此三重故又十使中五見  
及疑但障見道餘四道於見修故略不言就  
其六中三本三隨偏語其本邊見隨身見邪  
見隨疑見取隨戒取故斷三結三隨亦斷但  
立三淨上五大小並同小乘行淨在修道起  
斷行故行斷在無學道依行證斷故大乘後  
二皆在修道斷障成德故有二也行實同時  
若約位分七地已還爲行斷修道斷結故八  
地已上入法流中順菩提故名思量上上餘

文易了第二明如道行又順經意前明入心  
從此已下皆明住心應分爲三此攝方便具  
足住修行十心是方便義不退轉者即是住  
義二不住道行勝攝離癡亂行智清淨等無  
癡亂故三彼果勝攝無盡功德藏回向攝德  
無盡故今且順論此明如道行於中三初標  
分位爲顯隨如已入五地次以善下總顯後  
願力下別明總中四句皆是正修諸行故總  
名順如謂前二句爲所治即四地修菩提分  
以前十心能善清淨得入五地於此淨心希

求勝相即復是慢慢在文外故以後二句而  
爲能治初句轉求不住道行勝爲能治謂不  
住淨心而起諸行即治住淨慢故後句雖起  
諸行不退失前平等深淨之心則能隨順真  
如平等即如故後別明中顯上隨如之行有  
其八種經有九句前七各一後二爲一八中  
前二是起行心一自利願即修菩提心二利  
精大他慈即不疲倦心後六是行謂三得善根力  
四不捨衆行五善巧修行六無厭足故照明知  
上上七得他勝力八自得勝力此有二句初

句具三慧念是聞思智即修慧後句勝進究竟上六行中前三自分後三勝進各有初中後思之第二不住道行勝有二種觀一所知法中智清淨勝二佛子至得如是諸諦下利益衆生勤方便勝初即自利護煩惱行故不住世間後即利他護小乘行不住涅槃同時相導名不住道今初智勝分二先明四諦實法分別後善知俗下復就此四明十觀門化生差別此乃十種觀於四諦非謂觀十四諦也故瑜伽住品云此地於四聖諦由十行相

如實了知今初言實法者有佛無佛苦集二諦體是妄想雜染因果滅道二諦體是出世清淨因果此約諦實義釋若約審諦釋者前二無佛不能知此是苦是集寧有後二滅道因果餘如本品後十觀中略啓四門一制立謂四諦義舍法界菩薩窮照無遺隨智異說難窮略舉十明無盡然十皆菩薩自智智相難明故論約化生以明其異以此通名所知法中智清淨也二明開合此十總唯是一化生分別若隨所化大小分二前九化小後一

化大故若隨化所起則分爲三前五生解次四起行後一令證故約人不同離以爲七初爲根未熟乃至七爲大乘可化故至文當知三對實法以明通別此十望前四諦前五通觀四諦謂一世俗者觀四諦法相二觀其性空三通觀性相無礙四觀性相各異五觀此  
第四緣起集成次四別觀四諦謂六七八九如次觀苦集滅道後一但觀滅道菩薩地因證佛智故遠公後五亦通觀四諦謂迷於四諦故爲苦集悟其四諦故成滅道後一窮四諦

緣起實性清淨法界成大乘道亦有此理四正釋文文分爲二初列十名後此菩薩下次第解釋於中略爲二解一依瑜伽二依本論今初瑜伽十句不顯文詞而略所說義闕其第十知菩薩地而亦有十句文有三節初三名爲此說謂是所爲故一依曉悟他故知俗諦二依自內智知第一義三依俱處所故知相諦謂自相是俗共相是真二體不分故名俱處次今經兩句彼應有三名由此說謂由三藏教之所說故云依於契經調伏本母

名由此說經中分位差別應是調伏知蘊界處義當本母此中第十義當契經三有四句名如此說謂如四諦相各別知故即依於現衆苦自性故知事諦依於未來苦生因性依於因盡彼盡無生性依於修習彼斷方便性如次可知二依本論者攝十爲七初一爲根未熟衆生謂未堪入大爲說四諦十六行等名知世諦即四重二諦中第三重內俗也不同瑜伽通於大小及根生熟二爲根熟堪入大故爲說法空第一義諦三爲疑惑衆生

故知相諦謂有聞第一義諦猶豫不決若是空耶則無因果若是有耶云何言空今明即俗自相是空共相俱處無違故名相諦四爲謬解迷惑深法衆生故知差別謂前緣二境故名爲疑今聞俱處便謂是一名爲謬解今明體雖不異性相分位歷然差別五爲離正念衆生故知成立諦謂既聞差別謂皆有體名離正念今明差別但是緣成無有自性故云成立隨言顯示故論經名說成諦六爲正見衆生知事等四諦由無前疑執故名正見

可令知苦斷集證滅修道事即苦諦生即集  
因無生是滅因亡曰盡即盡智也後果不起  
名爲無生即無生智也若小乘說現在惑亡  
說名爲盡利根之人保彼煩惱當更不起名  
曰無生此盡無生是其滅體無學之智如是  
而知意在取滅故爲滅諦道言無二者論下  
重釋云一行故謂稱滅而知故云一行前列  
實法四諦明其所觀此中四諦明當如是觀  
七爲大乘可化衆生故知菩薩地乃至如來  
智諦謂先住大乘化令進故言正覺一切相

者大乘要須於五明處善巧知故菩薩地是  
因言次第相續者如從初地入二地乃至十  
地入佛地大果也以信解等者爲釋外疑六  
地已上乃至佛智未曾證入彼云何知故此  
釋云信解鏡像觀智力知非成就智鏡像即  
影像觀未得本質故第二利益衆生勤方便  
精  
勝中二先總起悲觀二佛子下別起悲觀總  
中三初結前次如實下觀過後菩薩下起悲  
於觀過中先明非真後詮惑下對人彰過今  
初虛妄二字觀內五蘊謂妄想常等不相似

無故虛此明所取非真理無不同情有故云不相似無也常作我想慢事故妄此辨能取不實非有計有常樂我淨皆名我想非唯我見我爲本故獨云我想也詐僞二字觀外六塵世法牽取愚夫故詐此顯能取迷真謂由妄取令彼世法隱虛詐實使其貪取也世法盡壞故僞此明所取不實世法相似相續似有義利而實速滅無利故僞後對人彰過者上虛僞二境引心總名爲詐妄詐二心迷境皆名爲惑論云常等相無非有似有故虛事

中意正取者此解虛是詐義謂令意正取故是誰也又云我想慢事正取故妄事是患此解妄是惑義世法利盡故詐事牽心此解僞是詐義世法愚癡凡夫牽取故詐事相現此解詐是惑義愚夫即是依彼正取我慢之人三三起慈悲者憐愍故悲勝利益故慈不住道行勝故云轉增皆言大者勝前地故云光明者救生方便智成故轉增光明俱通慈悲文有影略轉前慈愍分同諸佛教名爲生第二別起悲觀中二先明化生願二如實觀下明

化他心今初先牒前得是智力近牒觀有爲遠牒觀諸諦不捨衆生牒前慈悲後常求佛智正明起願願救衆生義故二化心中二先明大悲觀後佛子菩薩摩訶薩復作是念此諸衆生下明大慈觀前中悲有二相一如實觀苦因緣集故即知苦體性二佛子至復作是念此諸凡夫下觀深重苦人而多故即就人彰過前中四初總標二際二知從下順觀二際三虛妄下逆觀二際四若有下結如實知今初前即過去後即未來顯無始終流轉

相故二順觀中二先明前際後如前下類顯後際前中復二先顯緣集苦聚後無我下顯二空無我今初無明有愛顯流轉因能發能潤此二爲本故生即是累故涅槃云生死本際凡有二種一者無明二者有愛是二中間有生老死今菩薩觀此而起大悲亦亦淨名從癡有愛即我病生矣然生果有三一欲求衆生故流轉生死欲貪即是受身本故二妄梵行求衆生故於蘊宅不能動出外道計我常住其中故三有求衆生故增長苦聚三有

皆苦故後顯空無我及類顯後際並顯可知  
三逆觀中順即苦集逆即道滅虛妄斷盡即  
是滅也出離是道四結如實知即雙結二際  
逆順有無三義一約凡夫但有苦集而無滅  
道二約菩薩順有逆無三雙約凡聖真滅本  
諸  
六  
有道亦符之妄苦本空集亦同爾凡夫迷故  
不覺不知菩薩正了名知如實第二觀深重  
苦者無始隨逐故深種種苦事故重文中二  
初總標可愍不知本空故名愚癡不知狀離  
故云無智亦可俱通故爲可愍二有無數下

釋可愍所由由迷二苦故初明深苦不知故  
爲可愍後如是盡下明重苦不知故爲可愍  
於中二初牒前訶後二轉更下正明重苦於  
中三初觀生苦機關苦事即是生苦言機關  
者顯無我故抽之則動息手便無若造業因  
生生不息隨生死下明有集愛於諸蘊下明  
離滅道二不知下觀老病死四大毒蛇是不  
知病苦不能拔下明具彼集文有四句一妄  
梵行求衆生不能拔出諸慢見箭外道多起  
故二欲求衆生受欲者不能息三毒火三欲

求衆生行惡行者不破無明以見少利行大  
惡行後受大苦故云黑闇四有求衆生不竭  
愛欲大海三有之愛廣無邊故觀如實中說  
彼三求以爲苦果今爲集者三求皆能爲集  
第八  
因而受果故二文互舉次不求十力大聖導  
師明遠彼滅不向滅者故入魔意下明遠彼  
道順怨道故三於生死下總結過患舉生死  
海總顯於苦覺觀波濤總明有集此中兼顯  
死苦之義略不明老第二大慈觀中二初觀  
境興慈後佛子下廣願饒益前中二先觀境

後我今下興慈今初即觀前衆生受深重苦  
以爲慈境文中先總無救下別總中無父曰  
孤明前無所恃塗盡曰窮明後無所依任重  
無替曰困常受生死故強力所逼曰迫業惑  
所陵故後別中無救無依釋上孤義論云謂  
現報已受不可救脫當報因招無善爲依次  
無洲無舍釋上窮義溺於覺觀波濤不聞正  
法智洲爲對治故在於生死曠野不爲善友  
慈含庇故次無導無目釋上困義離於寂靜  
正念思惟究竟前導故離於正見之明目故

既無導無目非因如何次無明下釋上追義無明者無明住地舊煩惱故黑闇者四住客塵故常起邪念故爲其覆翳不聞正法故爲彼纏裹二興慈中獨拔修善令物得菩提涅槃之樂第二廣願饒益亦彰慈所爲文中二先牒前總明上來修善皆爲救護即是慈相後利益下別顯救護有十種相前二爲救未來後入通於現未一住不善衆生令住善法利益二住善法衆生令得安樂果謂成彼善故三愍貧乏者與資生具四修行多障者令

其成就上二救順緣不足苦五世間繫閉者  
令得解脫下有五種令諸外道信解正法謂六未信攝令正信七令離無利勤苦八疑惑衆生疑除解淨九已住決定勸修三學以調三業十已住三學令得涅槃上三即解行證論意皆爲外道理實後三兼通餘類上來不住道行勝竟自下大文第三明彼果勝即不住道行勝之果有四勝果一攝功德勝二名爲無狀足下修行勝三佛子菩薩摩訶薩如是勤修下教化衆生勝四佛子菩薩摩訶薩

爲利益下起隨順世間智勝四中初二自利  
即所知法中智清淨果初自分後勝進後二  
即利他勤方便果前化他行後化他智今初  
攝功德中十句初三攝聞勝然有二義一即  
三慧如次配聞思修二顯二持念即聞持智  
及有趣即是義持義有多種略說二種善巧  
謂智即法智勝有趣即義智勝然二釋皆聞  
在初故論名攝聞勝次二攝戒勝一忍辱殺  
和勝即戒因成也謂內懷慙愧不誑幽明自  
護七支不招譏毀故能持戒二戒無缺勝即

戒體成也乃至命難不捨戒故後五攝智勝  
一者因緣集智此知法相智無因倒因名爲  
非處正因緣集名之爲處知處治於非處故  
名覺者二者證智知魔事對治隨識分別皆  
魔事故三知妄說智異說對治即知教智正  
說爲義句邪說爲非義句邪正交雜揀邪得  
正名善分別四神力起用智依定起通治邪  
依故五化衆生智折伏攝受隨世宜故上五  
中前三自利後二利他第二修行勝有十一  
句前四自分一增長因行集五度福故二依

止因行慧爲所依故此自利福智對三化生  
不疲行四令物證滅行此二利他因果對後  
七勝進五起佛法行六起淨土行此依正一  
對七依佛法身起行相好法身故八依佛所  
作起行顯三密用故此二外相內密對上四  
皆起菩提九敬重法行進依勝已故上五自  
利後二利他十願取有行十一離小乘行即  
顯是揀非對第三教化衆生勝中二初正明  
化生後佛子下結行成益今初分二初總以  
四攝攝生後示現色身下別明四攝文有八

句一示色身是同事攝隨順衆生應化自衆  
故二演說法即愛語攝諦語法語爲愛語性  
一切種愛語中多約開演論云爲疑惑衆生  
即一切門中之語也三開示下皆利行攝此  
句爲於菩提無方便衆生示菩薩行即利行  
自性四於大乘疲倦衆生示佛威力即一切  
利行未成令成故五爲樂世間衆生著財位  
故示其過患明位大憂大財多禍多六爲不  
信大乘先未行勝善讚如來智七爲無智外  
道示以神通上三即難行利行八總顯一切

門一切種利行故云種種方便然利行愛語亦可參用由彼愛語示其所學即爲利行故次下廣明布施故別中略無四攝廣義如瑜伽四十三辨第二結行成益中初結前心恒下成益趣佛智者爲化衆生更求勝力餘文

別入  
二

已作不退未作增修第四隨順世智勝者明深障對治染即煩惱障即所知文分爲三初總標多門二所謂下別示其相三及餘下總結成益二中顯五明相故大般若云五地菩薩學五明故即分爲五一文字筭數是其聲

明通治懦智障言文字者名句文身即聲論中法施設建立故筭數即數建立故又治取與生疑障二圖書至咸通達即當因明咸通達者正是明義種種論者言論尚論諍論毀謗論順正論教道論等類非一故地水火風即是諍論中攝謂諸邪見計不同故順世外道唯地爲因一切皆以微塵成故水風二仙外道以風水爲因世界水成故風輪持故事火外道以火爲因火成熟故圖書印璽即尚論隨世所聞故又此圖書亦正教量即治所

用事中忘障論云取與寄付即事中障間法思義解中障作不作已作未作應作不應作皆業中障印璽亦是現量又治所取物不守精六護障璽即玉印三叉善下即醫方明即四大不調衆生毒相病障對治故善療能斷皆除  
廿一斷方便斷已不生故名爲善癩至蠱毒病相病因於中顛等內四大鬼等外衆生蠱毒通二有草毒蛇等毒故論經說呪藥等即病因死因對治即善方藥攝四文筆下工巧明文筆讚詠即書算計度數印工業中書所攝故

韻屬曰文對詞曰筆顯德爲讚寄情曰詠次歌互談說即音樂工業悉善其事通上二文皆憂惱障對治國城至其宜即營造工業草樹華果亦兼營農工業此即不喜樂障對治金至示人即生成工業繫閉障對治日月至無錯謬即占相工業是所得報分過作惡因障對治謂皆由前世惡因感此凶吉等故日月五星以爲七曜及二十八宿並上知天文地震即下知地理夜夢至休咎即中知人情鳥鳴即察鳥情亦是人情所感咸善無謬總

究上三才五持戒下內明治五種染一持戒  
治破戒染二入禪治貪欲染三神通治邪歸  
依染四無量治妄行功德染謂治殺生祀祠  
求梵福故五四無色定治妄修解脫染上來  
所釋多依本論及瑜伽十三四五其寧更有  
別理恐狀繁文又論與經有不次者但可以  
論就經不可迴經從論第二總結成益者此  
起世智具四種相一異障中無障故云但於  
衆生不爲損惱事中不知名之爲障損惱生  
事復是事中異障今無此捕獵等之異障二

與無過樂即爲利益故謂雖不惱令其染著  
亦不爲之三發起清淨即咸悉開示謂能起  
助道之事四所用清淨即漸令安住無上佛  
法謂用此得淨故第二位果亦有三果初調  
柔果亦四一調柔行二教智淨三別地行相  
精人四結說地相前中有法喻合法中正起行內  
又更聞法得陀羅尼者論云非得義持者對  
勝顯劣般若未現前故所以得聞持者得二  
難故一地初十平等心難得能得故二地中  
樂出世間智現世間智此不住道難得能得

故此之二難對劣顯勝故得聞持不同三地  
唯世間聞持喻中真金碑碣磨瑩者證智契  
如事爲真金教智光明能示現如事猶彼碑  
碣二佛子菩薩住此難勝下教智淨中日月  
等者論云依阿含增長智慧光明勝前地智  
故謂勝前地珠光餘文如前第三重頌二十  
二頌分三初十七偈頌地行次四頌地果後  
一結說初中又三初五偈三句頌勝慢對治  
於中初四偈頌十平等餘頌如道行第二了  
知下六偈三句頌不住道於中初兩偈一句

頌所知法中智清淨後既觀知下四偈半頌  
教化衆生勤方便於中初一偈頌總觀有爲  
虛僞起慈悲二心次一偈半頌悲觀中觀緣  
集苦次一頌半頌觀深重苦後半頌大慈觀  
第三名爲下四偈半頌彼果勝中初半偈頌  
攝功德勝次一頌修行勝於中如是一切爲  
衆生句兼頌教化衆生勝後三頌起世智勝  
頌位果三果可知五地竟

大方廣佛華嚴經疏卷第三十八

音釋

緩

胡管  
舒遲也

切

啻

施智  
止也

切

創

楚亮  
愆也

切

翳

翳蓋  
計也

切

懦

弱也  
奴卧也

切

壘

想里  
計也

切

蠱

公土  
計也

永樂北藏

大方廣佛華嚴經疏

第一七〇冊